

Informacije k zawěšćenju nastupajo křižerjow

Křižerjo su přez biskopstwo na wšelakore wašnje zawěšćeni, nic pak kompletnje. Na to skedźbnjataj justiciar Drježdžansko-Mišnjanskeho biskopstwa, Stephan von Spies, kaž tež justiciar Zhorjelskeho biskopstwa, Andreas Oyen.

„Jeli křižer njezbožo počerpje, je we wobłuku čestnohamtskeho džěła přez powołanske drustwo, kotrež biskopstwo wudźeržuje, zawěšćeny. Kóždy křižer je džě w nadawku wosady po puću, zo by poselstwo zrowastanjenja wozjewjał. Tajke njezbožo by so takrjec džěłowym njezbožu runało“, rozłóži ordinariatny rada Stephan von Spies. „To płáči tež w Zhorjelskim biskopstwje a z tym tohorunja za Kulowskich křižerjow“, wudospoňni Zhorjelski ordinariatny rada Andreas Oyen.

Nimo toho wobsteji powšitkowne rukowanske zawěšćenje wosady. „Z tym je wšo to zawěšćene, štož by so we wobłuku organizowanja nimokulić móhło“, praji Stephan von Spies a skedźbni na to, zo tele zawěšćenje jednotliwego křižerja njepotrjechi. „Tež tole je we woběmaj biskopstwomaj jenak rjadowane“, zaruči Andreas Oyen.

Specielne zawěšćenje stej wobě diecezy wotzamknyłoj, kotrež móže so potom wužiwać, nima-li wobsedźer koni rukowanske zawěšćenje za zwěrjata. „To móže na přikład być, jeli su konje z Pólskeje wupožčene“, rjekny Stephan von Spies. „W tym padže so jěchar jutrońčku wot wujěchanja hač do nawróta domoj takrjec w mjezyčasu kaž wobsedźer wobhladuje. To płáči pak jeničce při škodže, kotraž so druhemu načini, potajkim nic za jěcharja samoho. To je podobnje kaž při zawěšćenju psow: Jeli pos swojeho wobsedźerja kusnje, njepláči w tym padže jeho rukowanske zawěšćenje.“

Drježdžansko-Mišnjanske biskopstwo ma přidatnje njezbožowe zawěšćenje. Zasadnje płáči, štož je Michael Lorenzet ze Zawěšćenskeho běrowa Gassenhuber z Mnichowa hižo před třomi lěty w Katolskim Posole rozłóžił: „Kóždy, kotryž

znjezboži, je najprjedy jónu přez swoju chorobnu kasu zawěšćeny a dóstanje lěkowanske kóšty zarunane. Njezbožowe zawěšćenje je za pady inwalidnosće abo samo smjerće.“ Přiwšěm wón na to skedźbnja, zo njejedna so w tym padže wo wysoku sumu, kotruž by potrjecheny dóstał. „Nichtó njeby z tym trajnje swójbu zastarać móhł.“ Stephan von Spies doda: „Hačrunjež je to potajkim skerje symboliske, chcemy z tym zwuraznić, zo su nam to křižerjo hódni.“

Wobaj justiciaraj skedźbnjataj na to, zo je cyle wažne, kóžde njezbožo najlěpje samsny dzeń fararjej zdžělic, zo by to biskopstwu sprosředkować móhł. Tež mjeńše škody měli so přizjewić, dokelž njeje wuzamknjene, zo móhło z toho njewočakowana wjetša škoda wurość. Hdyž so to pozdžišo přizjewi, hodži so lědma dopokazać, zo je so to woprawdže w zwisku z křižerstwom stało. Njedosaha, z toho wuchadžeć, zo je farar wo njezbožu někak zhoniť. Wone ma so jemu direktnje přizjewić. Potom so indiwiduelnje pruwuje, kotre wuměnjena předleža a kotra zawěšćernja měła narunanje škody přewzać.

Zawěšćenje přez biskopstwu płáci jeničce za to, štož je tule wopisane. Wšo druhe ma so z wosobinskim zawěšćenjom rjadować, na přikład transporty a přihoty.

Wobmyslic měli křižerjo tež, zo měli po nastatej škodze po potrebjce tež policiju informować. Jeli so to hnydom njehodži, na přikład, hdyž za čas procesiona kón do awta kopnje, měť so pad samsny dzeń policiji přizjewić, hewak móhło so to jako čeknjenje wodžerja hódnoćić.

rl

słowničk:

powołanske drustwo – Berufsgenossenschaft

rukowanske zawěšćenje – Haftpflichtversicherung

rukowanske zawěšćenje za zwěrjata – Tierhalterhaftpflichtversicherung

njezbožowe zawěšćenje – Unfallversicherung

čeknjenje wodžerja – Fahrerflucht

Pokiwu nastupajo transportowanje koni

Nastupajo jězdženje z nakładnymi awtami a z tym tež za transportowanje jutrownych koni płaci wot oktobra 2017 nowe rjadowane. Wuwzaćna dowolność za priwatne wužiwanje nakładnych awtow na statnych swjatych dnjach kaž wulki pjatk, jutrońčku a jutrownu póndźelu njeje hižo trěbna.